



菜瓜棚仔

會記得彼陣阮猶細漢，厝是共人稅的，厝頭前拄好有一塊空地仔，佳哉無鞏紅毛塗，阮才會當佇遐種東種西。

阿爸佇建築工地靠共人搭鷹仔架來趁食，所以搭菜瓜棚對伊來講，會使講就親像桌頂拈柑遐爾簡單。伊的跤手誠扭掠，規堆的竹管和一捆鉛線，干焦看伊無閒半晷爾爾，一个二三十坪的菜瓜棚仔就搭好矣！

阿爸搭棚仔毋但欲予菜瓜旋藤，嘛希望鍛鍊阮的體力。棚仔一下搭好，厝邊頭尾就相招跔上棚仔頂去耍。我臆彼當時阿爸是為著欲證明伊搭棚仔的本等，所以據在阮佇棚仔頂跔踏。阮大力躑、拚勢跔，跔懸跔低，軀過來軀過去。較好膽的，對棚仔頂跳落塗跤，親像現此時的體操選手遐爾奢颯。有的較狡怪的，用跤勾跔棚仔幌來幌去，袂輸猴山仔。規陣囡仔絞做伙，耍甲烏天暗地。逐家身軀袂輸攏鬥電池，按怎耍都耍袂癢、按怎從都從袂忝！毋管按怎舞，棚仔連毖一下都無，棚仔恰阿爸粗勇的身體全款耐操。

菜瓜咧旋藤有夠緊，等菜瓜藤拋上棚仔頂，棚仔就變做菜瓜的地盤。蜂仔恰蝶仔走相逐，阮囡仔人干焦會當佇棚仔跤躑來躑去，看佗一蕊菜瓜花開了上大蕊。蝶仔的跤手若傷慢，就會予阮掠著！

一條一條菜瓜囡發出來，一工一工大條，阿媽略略仔相一下，就知影佗一條會當挽落來。若是挽較濟，除了暗頓會加一項菜，猶閣會使分親情朋友。一半條仔菜瓜去予菜瓜葉炭著，袂赴挽，煞傷柯去，姑不而將才留咧做菜瓜蒲。

毋知經過幾年，風吹日曝，棚仔已經袂堪得，有的竹管必開、漚去，敢若老歲仔人，真緊就欲行向人生的尾站。果然佇無佬久了後，阿爸就共棚仔拆掉，提來做柴燃，共遐的有阮的跤跡的竹管攙入去灶空內底。看著灶火愈猛，我的心肝窟仔就愈疼……。

便若看著彼塊空地，頭殼內底攏是菜瓜棚仔的形影，菜瓜穰猶原佇我的記持內底釘根，阮囡仔伴的笑聲佇我的耳仔邊轉轉……。

作者：洪素琴

☆詞彙學習☆

【鞏】khōng：以水泥或磚頭砌磚、牆等。

【桌頂拈柑】toh-tíng ni kam：用手指頭拈取桌上的橘子，比喻事情極其容易。

【扭掠】liú-liáh：形容手腳快、動作敏捷。

【旋藤】suan-tìn：指藤蔓植物的枝葉迴旋攀爬。

【本等】pún-tíng：本領、本事。

【據在】kì-tsāi/kù-tsāi：任由、任憑。隨意而為，不受拘束。

【跔踏】thún-tàh：不知珍惜的用腳踐踏。

【奢颯】tshia-iānn：大派頭、大排場。

【柯】kua：形容在品嚐蔬菜或瓜果時，有纖維粗糙的感覺。

【毖】sím：上下晃動、上下彈動。指柔軟有彈性。